



INTRODUCZIUN

DA SUR MARTIN BEARTH

En quei raquent digl evangelist Lucas stat il plaid «encurir» duas gadas. Ils geniturs da Jesus han stuiu encurir lur affon durant treis dis ed anflau el la finala el tempel. Per mei ei quei sco ina semeglia che vul dir a nus, ch'era nus stuein encurir, encurir Jesus, encurir Diu. Ei dat muments e situaziuns en nossa veta, nua che nus vein l'impressiun che nus veien piars Jesus, piars era Diu, ch'el laschi nus persuls, bandunai e trumpai. Nua anflein nus puspei el? Giusep e Maria han anflau Jesus el tempel. Era per nus ei la casa da Diu in liug nua che nus savein udir siu plaid, star a meisa cun el, clamar tier el. Jeu hai fatg l'experientscha ch'era ina eglia da anavos en mia veta vargada muossa che Dieus ei staus cun mei, adina puspei e ch'el vegn era vinavon ad esser presents. Ina legenda raquenta che Dieus hagi era schau anavos treis segirs fastitgs da sia preschientscha sin tiara: Las steilas, las flurs ed ils eglis sereins dils affons pigns. Gie, el ha schau anavos bia dapli fastitgs sin nies mund. Nus stuein mo arver nos eglis e nos cors persuerter. Era ina buna harmonica famiglia ei in clar fastitg da Diu.

EVANGELI

Lc 2,41–52

⁴¹Ses geniturs mavan mintg'on per la fiasta da Pastgas si Jerusalem. ⁴²Cura ch'el ha giu dudisch onns, ein els vegni si Jerusalem tenor l'isonza dalla fiasta. ⁴³Vargai ils dis, ein els semess sin via encunter casa, ferton ch'igl affon Jesus ei restaus a Jerusalem, senza che ses geniturs s'encorschien. ⁴⁴Cartend ch'el seigi en cumpignia dils pelegriens, han els fatg in di viadi ed encuretge el denter ils parents ed enconuschents. ⁴⁵Nunanflond el, ein els turnai si Jerusalem ed han encuretge el leu. ⁴⁶Suenter treis dis han ei anflau el el tempel. El seseva enamiez ils mussaders, tedlava ed emparava els. ⁴⁷Mo tut quels che udevan el sesmarvigliavan da sia intelligenza e da sias rispostas. ⁴⁸Cura che ses geniturs han viu el, ein els stai tut stui, e sia mumma ha detg ad el: Affon, pertgei has fatg quei cun nus? Uarda, tiu bab e jeu vein encuretge tei cun anguoscha. ⁴⁹Cheu ha el detg ad els: Pertgei veis encuretge mei? Savevas buca che jeu stoi esser en quei ch'ei da miu Bab? ⁵⁰Mo els han buca capiu il plaid ch'el veva detg ad els. ⁵¹El ei lu ius engiu cun els e vegnius a Nazaret e staus suttamess ad els. E sia mumma ha manteniut tut quels schabetgs en siu cor. ⁵²E Jesus carscheva e fageva progress ella sabientscha ed ella grazia avon Diu ed avon ils carstgauns.